



Broj: KSI-09-71/23

Datum: 14.04.2023. godine

Na osnovu člana 25. tačka (g) Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“ broj: 04/21) i člana 25. stav (2) Poslovnika o radu Komisije za odlučivanje o sukobu interesa, postupajući po anonimnoj prijavi od 31.03.2023. godine protiv U.V., zastupnika u Skupštini Brčko distrikta Bosne i Hercegovine, kao nosioca javne funkcije, na 52. sjednici održanoj 14.04.2023. godine, donosi

### ODLUKU

Postupak za odlučivanje o sukobu interesa protiv nosioca javne funkcije, U.V., zastupnika u Skupštini Brčko distrikta Bosne i Hercegovine, povodom navoda da je isti učestvovao u donošenju odluka koje se tiču JP „Komunalno Brčko“ Brčko distrikt BiH na sjednici Skupštine Brčko distrikta Bosne i Hercegovine, neće se pokrenuti, obzirom da iz prikupljenih podataka i dokumentacije ne proizilazi da je u postupanju nosioca javne funkcije došlo do povrede odredaba Zakona o sprečavanju sukoba interesa u institucijama Brčko distrikta BiH, odnosno postojanja sukoba interesa.

### Образложење

Dana 31.03.2023. godine Komisija za odlučivanje o sukobu interesa zaprimila je anonimnu prijavu broj: KSI-09-71/23, radi sumnje na povredu odredaba Zakona, odnosno postojanje sukoba interesa protiv U.V., kao nosioca javne funkcije, zastupnika u Skupštini Brčko distrikta Bosne i Hercegovine.

Naime, u prijavi je navedeno da U.V., zastupnik u Skupštini Brčko distrikta Bosne i Hercegovine, zloupotrebljava položaj i nanosi štetu Budžetu Brčko distrikta Bosne i Hercegovine, da je isti zastupnik u Skupštini Brčko distrikta Bosne i Hercegovine ispred ██████████, a ujedno je i predsjednik ove stranke, a zaposlen je u JP „Komunalno Brčko“ Brčko distrikta BiH na mjestu ██████████, te da je njegov stranački kolega D.V. predsjednik skupštinske Komisije za komunalnu, javnu djelatnost i zaštitu okoline, a koja usvaja finansijski plan, plan rada, plan nabavki, izvještaj o radu JP „Komunalno Brčko“ Brčko distrikta BiH, kao i to da je u Upravnom odboru JP „Komunalno Brčko“ S.V., rođak zastupnika D.V., a koji usvaja na imenovanoj Komisiji njegove Izvještaje. Takođe, podnosilac anonimne prijave zahtijeva od Komisije za odlučivanje o sukobu interesa da utvrdi sve relevantne činjenice, te ukoliko utvrdi postojanje povrede odredba Zakona o sprečavanju sukoba interesa, primjeni odgovarajuće mjere.

Članom 2. tačka c) Zakona o sprečavanju sukoba interesa u institucijama Brčko distrikta BiH propisano je da je „nosilac javne funkcije“ izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lice koje je imenovano, odnosno na čiji izbor i imenovanje suglasnost daje Skupština, odnosno Vlada, ukoliko drugim zakonom nije drugačije propisano.

Uvidom u Registar javnih funkcija i nosilaca javne funkcije, koje vodi Komisija, utvrđeno je da U.V. obavlja funkciju zastupnika u Skupštini Brčko distrikta Bosne i Hercegovine, na osnovu Uvjerenje Centralne izborne komisije, [REDACTED], te je obavezan postupati u skladu s odredbama Zakona o sprečavanju sukoba interesa u institucijama Brčko distrikta Bosne i Hercegovine.

Članom 11. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da nosilac javne funkcije ne može učestvovati u procesu odlučivanja niti glasati po bilo kojem pitanju koje nosioca javne funkcije stavlja u sukob interesa što uključuje pitanja koja se direktno i indirektno tiču privatnog preduzeća u kojem taj nosilac javne funkcije ili s njim povezano lice ima finansijski i drugi interes, te bilo kojem drugom pitanju koje se direktno ili indirektno tiče povezanog lica, dok je članom 14. stav (2) Zakona, propisano da nosilac javne funkcije ne smije koristiti svoj položaj za privilegovanje povezanih lica pri zapošljavanju i ostvarivanju njihovih drugih prava iz radno-pravnog odnosa.

Članom 17. Poslovnika o radu Skupštine Brčko distrikta Bosne i Hercegovine propisano je da zastupnici ne mogu učestvovati u diskusijama, razmatranjima i donošenju odluka o pitanjima koja su od ekonomskog ili drugog značajnog interesa za njih ili njihove krvne srodnike u pravoj liniji bez obzira na stepen, krvne srodnike u pobočnoj liniji do trećeg stepena, supružnike i srodnike po tazbini do drugog stepena, te da svaki zastupnik može istaći postojanje sukoba interesa u kojem se nalazi drugi zastupnik, odnosno zastupnici. Ukoliko Skupština utvrdi da postoji sukob interesa, zastupnik odnosno zastupnici za koje je utvrđen sukob interesa ne učestvuju u diskusijama, razmatranjima i donošenju odluka o tim pitanjima.

Uvidom u dopis Skupštine Brčko distrikta Bosne i Hercegovine broj: 02.1-05-1606/23 od 11.4.2023. godine, utvrđeno je da zastupnik U. V. nije učestvovao u raspravi po Izvještaju o radu JP „Komunalno Brčko“ Brčko distrikta BiH za 2021. godinu.

Nadalje, Komisija nije cijnila ostale navode iz prijave u odnosu na druga lica, tako da činjenicu srodstva između nosioca javne funkcije i ostalih lica nije uzimala kao bitno u ovome postupku, jer član 11. stav (1) Zakona se isključivo odnosi na samog nosioca javne funkcije, a ne na povezana lica.

Iz svega navedenog, a na osnovu prikupljenih podataka, dokumentacije i uvidom u iste, utvrđeno je da U. V. zastupnik u Skupštini Brčko distrikta Bosne i Hercegovine, kao nosilac javne funkcije, nije povrijedio odredbe Zakona o sprečavanju sukoba interesa u institucijama Brčko distrikta Bosne i Hercegovine, odnosno da ne postoji sukob interesa, te da nisu utvrđene okolnosti koje bi ukazivale na moguću povredu odredaba Zakona od strane nosioca javne funkcije.

Slijedom navedenog, Komisija je donijela odluku kao u dispozitivu.

Pouka o pravnom lijeku:

Protiv ove Odluke nije dozvoljena žalba, ali se može pokrenuti upravni spor pred Osnovnim sudom Brčko distrikta Bosne i Hercegovine u roku od 30 dana od dana prijema ove Odluke.

Predsjednik  
Komisije za odlučivanje o sukobu interesa

Admira Mujić, dipl.pravnik

Dostavljeno:

- Anonimnom podnosiocu, putem oglasne table,
- Internet stranici Komisije
- Evidenciji
- Arhivi